

四庫全書

史部

欽定四庫全書

史部

潘司空奏疏卷一

詳校官國子監司業臣納麟寶

編修臣裴謙覆勘

總校官檢討臣何思鈞

校對官主事臣雷純

謄錄監生臣胡澄

欽定四庫全書

史部六

潘司空奏疏

詔令奏議類二奏議之屬

提要

臣等謹案潘司空奏疏七卷明潘季馴撰季馴字時良烏程人嘉靖庚戌進士官至總督河道工部尚書兼右都御史事迹具明史本傳此集凡巡按廣東奏疏一卷督撫江西奏議四卷兵部奏疏二卷季馴巡按廣東在嘉

靖三十八年奏疏後有其子大復附記稱原稿幾三寸許散佚不存僅從掖垣覓之故所錄止此其督撫江西在萬曆四年奏疏之前有李遷萬恭二序其為南京尚書則在萬曆九年舊本列在兵部之後編次誤也季馴雖以治河顯而所治皆有治蹟集中如查議弓兵工食及損益南京兵政諸疏皆足補明會典所未備又查解兵衛存留糧餉濟邊諸奏

亦深切當時弊政足與史志相參考云乾隆
四十六年九月恭校上

總纂官

臣紀昀

陸錫熊

孫士毅

費

總校官

臣陸

費

墀

費

欽定四庫全書

潘司空奏疏卷一

明 潘季馴 撰

巡按廣東奏疏

○ 慎選民牧疏

題爲懇乞天恩俯念遠方慎選民牧以弭盜安民事臣
本以庸懦之資叨司風紀之任欽承重命出按雄藩日
夕憂惶勉圖稱使何入境之初卽值寇警潮陽海豐惠

來等處倭寇充斥南雄和平程鄉等處山賊縱橫閭閻
哀苦之聲州縣烽火之報無日無聞臣目擊其變食不
下咽寢不安枕雖當督行司道衛府州縣等官嚴加勦
捕而將不足恃兵不可用徒爾支吾終難寧謐臣嘗聞
之民窮而後盜起弭盜必先安民安民之道無他惟在
擇賢守令而已臣敢為皇上陳之昔渤海歲饑盜賊並
起漢宣帝拜龔遂為守遂曰海濱遐遠不需聖化其民
困於饑寒而吏不惜故弄兵潢池耳遂單車至府開倉

廩假貧民選用良吏慰安牧養盜賊悉平又昔交趾刺史多無清行吏民怨叛選賁琮為刺史訊其反狀咸言賦斂太重百姓空單京師遙遠告冤無所故聚為盜賊琮即移書告示招撫荒散蠲復徭役百姓以安夫今之廣東即如昔之渤海交趾也今廣東之盜未必如渤海交趾之盜也而致盜之由未必不起於海濱遐遠民困於賦斂而無所控訴也倘今之守令者果有龔賈之徒出而撫之未必不投干毀戈安土樂業如渤海交趾之

盜也然則即今弭盜之術其有過於擇賢守令如龔賈者乎臣昨覩今歲考察邸報廣東所去府佐與州縣正官共三十八人較之他省獨多大半其故何哉蓋由嶺南之地土產累多珍奇載之出境其利百倍人情於此已為易動而處此者又多日暮途窮之人寧能責其廉乎且去京萬里縱使盜跖為之郡守檇杭饕餮為之縣令民日百千輩羣嘲而聚謗之朝廷之上未之知也不得已而訴之上司上司不知偶從而抑之則死且無告

矣欲走京稱寃而費以百計富者難之而況於貧乎此
官之易以肆民之日以威相率而趨於盜也臣聞之先
臣丘濬曰遠方之民易動者非民之情習然也治之者
不得其人也蓋遠方州縣得一良令如得勝兵三千人
得一良守令如得勝兵三萬人方其相安無事之時一
方數千里之地得二三十輩之賢守長則足以安之矣
不幸而民窮起而為盜為亂非得數十萬人馬錢糧未
易平之也嗚呼明用數十萬於有事之時人之所知而

潛省數十萬於無事之中人特未之知耳此民牧之所
以為重而擇賢牧於遠方尤為重也然州守縣令之選
大率皆筮仕之人銓司者未經試用豈能遂知其賢不
肖乎臣竊謂我國家官人之法雖曰三途並用而特重
進士之科是以歷朝建功立業者進士十居八九蓋士
子既蒙進士之選莫不有砥礪上進之心縱有識趣卑
污不自愛惜者亦十之一二也舉貢之人每以資格自
限而況歷試多年方行就選精力為之減損意氣為之

折磨報國之心輕營家之念重矣其豪邁之才堅貞之操難保盡無殆亦十之一二也我皇上試以今歲考察觀之甲科之與舉貢多寡相去果大相懸絕否乎況蠹茲下民貴耳賤目一聞舉貢便生輕易之心苟遇甲科即起驚憚之意而為之甲科者少知愛民頌聲遂作誠所謂事半而功倍者也昔唐玄宗詔新除縣令試理人策而以韋濟詞理第一者為醴泉令意者其在斯乎然司銓者豈不欲盡以甲科之人分布天下州縣特以應

選之人甲科恒少舉貢恒多而州縣者又舉貢之正選也廣東向稱樂土雖以庸才處之苟不至於極敝大壞亦可支吾但今之廣東非昔日之廣東則今日之治廣東者亦不當以昔日所治之人治之耳伏望皇上俯念遠方之民久罹盜賊之慘勅下該部備查廣東見在州縣員缺摘將緊要處所如廣州府之東莞連州南雄府之始興惠州府之和平潮州府之揭陽惠來等處俱將新中甲科除授勒限赴任其清遠海豐程鄉四會等縣

雖亦係盜賊淵藪但有見任官員遽難更易候各去任
之後仍乞補選甲科倘甲科之中有不自愛者容臣等
細訪參治比舉貢之人更加嚴峻則倭夷充斥之地必
多捍禦之方山賊縱橫之鄉必多招徠之術良民有所
恃而不恐頑民有所畏而不為且使海濱之民咸知我
皇上留心遠地加意窮民其鼓舞震懾之機又有不可
言者百姓安樂寇盜消弭而可以保聖治億萬年無疆
之休矣

嘉靖三十八年八月二十六日奉旨吏部知道

添設縣治疏

題為添設縣治移置所司保障地方弭盜安民事據廣東布政司經歷司呈為議及時勘處積叛地方以絕後患以圖久安事奉本司劄付准本司等衙門掌印左布政使等官魏良貴等咨關各准本司咨關准分守嶺西道右參政吳桂芳咨據肇慶府通判呂天恩呈稱遵到本府四會縣督同知縣張文光拘集通縣里排鄉老歐

陽應奎等審據衆稱勦平諸巢萬山聯絡地方曠遠應立縣治等情隨帶地師親詣經勦地方拘集熟知地利人役徧歷諸巢看得各處山勢險峻溪流湍急止有地名潭圃地宇平行山水環抱民居稠聚為四方道路適中之所詢之輿情皆稱堪立縣治其地南去四會縣一百三十里係遠僻地方今立縣治居中控制內可以據險要防遏夷酋外可以復膏腴撫綏良善將附近太平柑欖大圃三都地方分割太平一圖九圖十圖柑欖一

圖三圖四圖五圖十圖十二圖十四圖大圃三圖共一
十一圖查據黃冊通計大小人戶一千一百有奇官米
二千四百九十九石八斗三升四合八勺民米二千一
百三十九石一斗六升四合八勺後有清山賊田開荒
餘地或數畝無徵或陞科增稅俱附入新縣其漳圃遠
近等處田地雖坐落太平柑欖大圃三都地方亦有先
年賣出別圃戶內相應清查撥正蓋田地既在此方稅
糧合歸新縣撥正所以增戶口便糧差清查所以息爭

訟防影射庶事體歸一其清遠懷集二縣都圖查係別
省別府地方不必分割恐道傍築舍徒費周章潭圃既
立縣治若前後左右無藩籬之固恐懸孤城於萬山似
櫻螳臂於虎口難保將來寧謐如今日也又看得地名
龍口水在潭圃之北五十五里內扼三塘徑下等處最
為要害應立屯田千戶所移四會後千戶所在彼守禦
及查得肇慶衛前所中所原有屯田細糧五百餘石在
彼合將屯軍二百名盡撥前去依屯耕守免其差調龍

口一軍專令居中策應保障地方以護耕種其有空餘田地聽從鄉民開耕入彼居住以助兵威此一舉而軍民兩便也及照潭圃之東八十里有地名雙車圃界連清遠切照葵梅諸洞合移金溪巡檢司建立在彼掣青草大徑大坑三營之兵共二百六十六名協同守把及有南綏一營在龍口水東五里雙車圃西五十里乃盜賊出入之衝照舊存留在彼掣黃沙古竈二營共兵二百九十一名湊入戍守使西應龍口東援雙車聲勢既

張雖南綏有急亦有所恃而自固矣龍口之西三十里地名扶落口乃白茫鷺叫扶黎顧水諸巢之咽喉合移扶溪巡檢司建於彼處保其巖阻以繫人心居業又有地名鷺鷥坪在扶落口西三十里接近蓮花磑心螺殼山及廣西懷集等處惡峒地方險遠屏蔽空疎若欲扶溪安枕先於此處設立一營招回附近原被逼出慣戰鄉兵二百名在彼墾田居住月給行糧四斗五升以資耕守候田畝成熟住支行糧即將黃桐峽徑鶴水三營

兵壯一百八十五名移出彼處合營併勢以壯軍威而扶落一帶地方耕守可無虞矣凡此乃形依層齒勢成掎角潭圃之地昔為邊鄙今居腹心龍口雙車南綏鷺鷥等處皆為藩籬屏限城池峙立營壘錯居血脈貫通聲勢聯絡可以扼賊喉吭奠麗生民以後公署建而道路自開墟市立而商賈自聚開墾盛而流移自復盜賊息而村落自充聲教達而人材自出惟在上者倡導鼓舞之而已矣其於築建城池衙門儒學營堡等項工費

及丈勘開墾賊遺田地查處遺累糧米等項事宜俱候
請立縣建官之日次第舉行改州建縣重務再加審處
等因畫圖貼說呈詳到道該本道會同帶管分巡僉事
殷從儉議照四會地方綿亘三百餘里考之前代唐宋
間設有一州四縣其後併為四會一邑以致山多地曠
聲教不行遂為各賊據盤敢稱抄掠鄉村荼毒為患有
年今當大兵平勦之餘正屬經營更始之際所據增立
縣治控制要衝以杜遺孽潛滋陰據之謀以貽生靈久

安長治之利揆之理勢誠不可已今該原任通判呂天恩督同該縣正官親歷蕩平巢穴沿鄉相度欲於地名潭圃人烟稠密風氣攸鍾之所建立縣治將附近太平柑攬大圃三都內分割共湊一十一圖大小人戶一千一百有奇官民米共四千六百三十八石九斗九升五合五勺屬其統轄後有清出賊田開荒餘地俱附入併管所慮縣治孤懸賊易窺伺迤北則於龍口水地方掣四會千戶所官軍并肇慶衛中前二所屯軍且耕且守

以示控扼復掣金溪巡司并青草大徑大坑三營之兵
於雙車園以衛其東移扶溪巡司於扶落口設鄉兵營
於鷺鷥坪以捍其西藩籬鞏固經度周詳職等反覆參
酌似在可行但該府初議四會陞州以相犄角揆今事
勢甚定可不必更為之圖矣及照前項縣治設在巖險
之中地僻事簡所有官屬合照依裁減衙門事例縣設
知縣典史學設教諭訓導各一員仍隸肇慶府統轄吏
典亦照裁減設置庶官無冗濫之嫌民免供億之累等

因備咨到司案查先奉提督兩廣軍務兼巡撫兵部右侍郎兼都察院右僉都御史談愷會同鎮守兩廣地方總兵官征蠻將軍太子太保靖遠伯王瑾批據肇慶府申前事准本府知府盧璘開稱四會地方萬山聯絡諸徭盤據近年連結出沒劫掠占奪官民田地擄掠子女財帛幸遇撫按憫念生靈奏奉欽依徵兵選將撥畧授奇不泱旬之間而首從賊徒馮天恩等相繼授首俘斬數千各賊敗亡之餘雖尚結巢拒守而勢孤食盡行當

不戰而自斃矣自古莫敢誰何之寇一旦殄滅此誠千古之快希世之功也時士狃近利大人懷遠猷故久安長治之計今日士民於撫按不能無厚望焉蓋竭澤而漁澤盈則魚復生焚林而狩林茂則獸仍往前賊所據土地寬饒形勢險惡固盜賊之林澤也若不及時處置竊恐數年之後復如昔日之患查得郡誌四會縣前代為南綏州今在柑欖都石澗村領縣四一化蒙縣在今太平都東鄉村一新招縣在柑欖都新招村一化注縣

在今柑欖都綠水村一化穆縣在今大圃都康谷村厥後併為四會縣國朝因之為里九十二緣山多地廣政令不及遂為搖據里數漸促今僅存四十二里以此觀之為今之計必增立縣治方為久安之策合無乘此兵威振揚之際諸賊殄滅之期定委識明才練官員帶領曉知地利及合用員役親詣巢穴逐一踏勘某處地土平衍適中定為縣治某處險惡咽喉擬為巡司中間料理事宜夷險隘通道路治城池營衙門募流亡實廂落

分都圖設里甲定民居析田畝設營寨議戍守立墟市
通商賈建儒學育人材東則割清遠縣西則割懷集縣
各一十里湊成一縣使四面開達各縣聲勢相連迨勘
處已周規式俱定然後奏請立縣治設官即以四會縣
陞為四會州以統之仍隸本府則殘獠當變為良民各
賊莫為之淵藪久安長治之道或在是矣等因奉批仰
布按二司會同守巡道議報并蒙巡按廣東監察御史
徐仲楫批據肇慶府經歷司呈同前因蒙批布政司會

議詳報依蒙已經會行該道委官親詣地方勘議去後
今准前因行間又蒙本院批據該府通判呂天恩呈前
事蒙批布政司會議報奪并奉提督兩廣軍務兼理巡
撫兵部右侍郎兼都察院右僉都御史王鈺會同鎮守
兩廣地方總兵官征蠻將軍太子太保靖遠伯王瑾批
據本府申同前事奉批仰布按二司會同該道議處詳
奪依奉各備咨關到職該布政司掌印左布政使魏良
貴會同按察司掌印按察使汪柏嶺西道分守右參政

吳桂芳帶管分巡僉事殷從儉議照四會縣太平柑欖等處地方僻在萬山之中盤亘不下百里東北則直抵連陽郴桂迤西則密邇開建懷集實羣盜出沒之衝二省犬牙之地具間山箐險隘徑路崎嶇土田膏腴林木暢茂據而守之足以杜奸宄之潛滋棄而不守未免為逃逋之淵藪况前此本為州縣之舊區縣全則民賴之為保障縣廢則賊據之以陸梁今當大兵振蕩之餘正屬與民更始之會若不及時城其險要扼其咽喉猶恐

數年之後遺孽復滋將來之患不可勝言所據建立新縣以控要害移置屯軍以便戍守遷改巡司以固藩屏清查稅糧以正經界裁減官吏以省浮費一應應行事宜既經委官勘處停妥又經該道會議相同俱應准議施行但府原議以四會縣改陞為州統轄新縣一節事出更張似難准議合無候題請允日備行該道將添設縣治移軍屯守遷改巡司清查稅糧裁減官吏等項事宜一一取次舉行庶夷險為易化盜為良遐邇蒙安靜

之休生靈免荼毒之苦此誠萬世無疆之利也備劄呈
詳等因到臣查得先據肇慶府經歷司呈為議及時勘
處積叛地方以絕後患以圖久安事并據該府通判呂
天恩呈同前事俱該前巡按監察御史徐仲楫批行布
政司會議詳報去後今據前因臣會同提督兩廣軍務
兼理巡撫兵部右侍郎兼都察院右僉都御史王鈺鎮
守兩廣地方總兵官征蠻將軍豐潤伯曹松議照大盜
雖經征剿後患猶當預防臣等查得四會縣所轄太平

柑欖大圃三都共計一十一圖地土附近潭圃與龍口
水雙車圃扶落口南綏營鷺鷥坪等處地方俱係四會
清遠并廣西懷集賊寨咽喉先因山場僻遠人迹罕到
號令不通所以無藉亡命之徒皆居之日久黨與漸多
負固險阻肆行流劫毒苦生民今葵梅白芒鷺叫扶黎
顧水蓮花磓心螺殼諸巢既已破蕩及時城其險要據
而守之足以杜姦宄之潛滋而為生民之保障失今不
處恐無藉之徒仍據舊巢不過數年必將復聚其時再

動兩廣之兵又糜數萬之費圖之已無及矣臣等竊以
為開設縣治於潭圃移置千戶所於龍口水以控制羣
巢於勢為便移金溪巡司於雙車圃扶溪巡司於扶落
口存留南綏營添設鷺鷥坪營掣併青草黃桐等營兵
壯併勢防守亦於事勢有不容已蓋潭圃者當諸巢之
咽喉雙車圃扶落口南綏鷺鷥坪者俱潭圃之屏障勢
必相須其巡司營堡事體已有成規不過遷移之勞所
費無幾且詢之父老衆口一詞莫不舉手願望惟恐或

阻究其所以皆緣地方之民積苦盜賊設縣控禦之議
民間私議已久人心冀望甚渴皆以為必須如此而後
百年之盜可散數邑之民可安蓋以縣治既設則官民
相近法令自無阻撓所司移守則藩籬慎固奸宄不敢
窺伺是誠弭盜安民久安長治之策也伏望皇上垂念
一方荼毒之苦俯從百姓永遠之圖乞勅該部查議如
果於事體無碍地方有益准將四會縣分析太平柑欖
大圃三都共計一十一圖地方於附近地方潭圃增設

一縣定擬縣名官員量行裁減與儒學職官印信乞賜
銓選鑄給仍乞將守禦四會後千戶所官軍併肇慶衛
中前二所屯軍移置龍口水依屯耕守立為屯田千戶
所免其差調鑄換印信及移掣金溪扶溪二巡司俱改
屬新縣其築砌城垣起蓋衙門等項候命下之日容臣
等督令該道守巡官逐一處置漸次舉行事完通將支
用過錢糧數目造冊奏繳如此庶二省殘孽有控制之
所一方生靈免劫奪之虞豺狼之窟變為樂郊而陸梁

之輩化為良善久安長治無出於此實為地方官民至幸

嘉靖三十八年八月二十六日奉旨該部知道

貪酷有司纏訟未結疏

題為貪酷有司纏訟未結乞恩俯念沿海地方久遭兵火先行銓替賢能官員以弭盜安民事據廣東按察司經歷司呈奉本司帖文蒙臣牌行提弔犯人蔡明復等一千人卷究問具招解審仍查本官緣事日久未結該

縣倭患緊迫應否先行作缺速議詳報依蒙查得先奉
提督兩廣軍務兼理巡撫兵部右侍郎兼都察院右僉
都御史王鈺批據潮州府潮陽縣儒學生員蕭與衡狀
令義男蕭德抱訴為非法坑儒興兵焚劫乞救無辜事
潮陽縣申為豪惡生員侵占城池馬道聚眾毆傷公差
事潮州府申為城池事俱奉批仰本司併究解依奉行
據該府呈稱先蒙分巡嶺東道信牌行府提得知縣蔡
明復犯人陳逢舉等連卷解道審發廣州府同知曹司

賢問理呈報前來催據本官呈稱前項事情蒙委會同潮州府通判翁夢鯉究問緣蔡明復給假未回除呈稱前項事情蒙委會同潮州府通判翁鯤分巡道請發會問完日另報本司看得蔡明復贓跡敗露穢聲彰聞既經行提即應收問豈有放回省假之理明是各官推奸縱容理法何在凡鞫問干証即同獄成公事稽程責有攸歸名節所繫不可不慎若再遲延當從重叅究又行催勘未報今蒙行司究議復行同知曹司賢查報隨據

回稱叅照知縣蔡明復贓私數以累萬告訐人連百家
據其情詞各有指實淫刑以逞不惟孤人子寡人妻而
且至有一戶連尸一代絕嗣者極欲以饗不惟破人產
蕩人家而且至十室九空十村半竄者積害盈庭流毒
徧邑酷聲昭著穢迹彰聞詞出庫里怨結士民聞事固
已寒心讀詞不覺流涕似應不待聽問之畢而即當追
奪者也緣以該縣時值兵戈一切干審俱歸保守且人
命等項重情與違法事等項衆犯俱干律例重典必候

審證公明不無延待月日即今地方兵事擾攘誠難久
缺正官況本犯訟証既衆律有即同獄成之條且其告
假不銷法有懼罪在逃之例即其規避亦應罷斥合無
將蔡明復知縣職名先行作缺具題銓補其所犯賊暴
事情一面拘証問解庶地方緊急之際免致久缺正官
且衣冠不齒之流免致妄意延緩具呈到司議照知縣
蔡明復緣事日久未結被告賊私數多所犯事情頗有
實據且干連人衆該縣地方逼近海洋倭患緊迫若候

問結作缺銓補委果延久廢事合無准照所議將蔡明復知縣職名先行作缺本院具題銓補本司一面催齊人卷委官會問明白具招解審等因備帖呈詳到官臣查得先據潮州府潮陽縣儒學生員蕭與衡狀令蕭德抱訴為贓官縱兵劫財燒屋焚屍害命事開款告訐知縣蔡明復贓私事情已批分巡嶺東道究招解奪續據該縣申為流賊打劫擄掠男婦耕牛事又為豪惡生員侵占城池馬道聚眾毆傷公差事及為城池事并據本

縣生員蕭與叙民人蕭德陳訓趙正林瑞時范阿鄭姚將等各狀告稱蔡明復貪酷情由俱經批行該道併究及節次督催俱未問報隨該臣看得該道向因地方多寇兵務方殷未及究理詞訟況查原屯揭陽倭寇與海賊許老合夥移營突至該縣隆井都屯住劫殺離縣止隔一江該縣向無正官經理事務責成隨即改行廣東按察司究問仍查蔡明復緣事日久該縣倭患緊急迫應否先行作缺題請銓補速議詳報去後今據前因臣為

照潮陽縣治西北萬山盤據東南大海濱臨實為水陸
寇盜充斥之所自去年十月內倭夷突登海口至今尚
未解散近又據潮州府申稱該縣山賊興發屠戮人民
焚蕩廬舍民不聊生至此極矣備禦撫綏要非賢守令
不可今自去年四月內蔡明復緣事被題該府屬正值
缺官向令縣丞范楠署理雖亦勉強支吾終難倚恃該
縣之民望賢令而安輯之真如赤子之望慈母及查蔡
明復被訐事情俱係賊私人命細加採訪實跡頗多原

情據法似無復任之理況干連証犯百餘俱因被寇四散一時難以拘齊若候結正之日方行銓補不無欠缺正官地方深為可慮伏乞勅下該部查議合無先於甲科中擇有才望者銓補給憑嚴限前來供職或於鄰省地方擇賢能素著者調補其蔡明復所犯事情容臣查照原案究問歸結如此則地方不致乏人而庶官知所警畏矣緣係貪酷有司云云事理臣未敢擅便謹題請旨

嘉靖三十九年六月十二日奉旨該部知道

地方緊急疏

題為飛報地方緊急事嘉靖三十九年三月十一日據
惠州府呈前事據考試生員王大化等稟稱二月初五
日有海豐縣縣丞朱傑帶領兵壯八十餘人前到碣石
衛拏賊奸黨知覺流言本官要徧索城中各心疑畏於
初七日早忽有三百餘徒呐喊哨聚將本官帶去阜壯
盡行綑縛今尚團聚陳公祠不知何為等因又據碣石

衛呈為邊軍缺糧激變事內稱本月初七日有海豐縣縣丞朱傑到衛督催查盤文冊追徵屯糧擅受詞狀多差民壯打手拘拏勒取紙價逼攀為盜又因久缺月糧致使衆軍出郭聚集教場等情各報前來臣即督行該道守巡併該府衛掌印等官作速區處解散無致延久釀成大患仍查朱傑招尤啓釁事由與為首倡禍人犯拏究去後隨據廣東布政司分守嶺東左叅政馮臯謨揭帖稟稱訪得該衛旗軍委果缺糧五年彼因縣丞朱

傑先署縣印之事據福建張元榮具告衛軍范子言等
窩盜事情止獲范子言到縣監候節次行衛捕拏餘黨
未獲後本官奉府差委往衛督催查盤文冊時有刑房
吏王志尹稟稱前賊歷案難拏朱傑就便多帶兵壯押
帶范子言到衛作眼認拏得賴汝善王仕榮李阿僧劉
信峯金志興宋禮成李雙溪戴真李璋等不期范子言
又稱係積年拖欠屯糧刀頭仍慮查盤問罪却就倡同
一般欠糧首惡數十人遂以五年缺糧為詞乘機鼓衆

激變已將范子言連倡首姓名訪實姑俟各軍解散另行拿究等因又行據該府查訪得縣丞朱傑帶領民壯前到該衛追捕賊犯指揮張廷佐不與公館安歇本官拘得賊犯范鑾供出同徒范元質等彼各知覺率領驍勇舍餘二百餘人圍衛開旗呐喊將本官併吏書門皂民壯共六十餘人綑縛痛打一場送在監內就到教場寫起激變旗一面宰牛一頭祭旗推立范元質為首分作四哨將城門鎖閉等因各到臣看得碣石之軍素稱

驕悍兼以久缺月糧向懷忿怨縣丞朱傑輕舉躁動假
公營私縱使緝捕強盜亦當申奉明文多方設法却乃
妄作威福挾帶多人沿門騷動希圖索詐以致奸徒倡
禍羣黨鼓噪相從指揮張廷佐係該衛署印之官使其
平時持正有以壓服衆心臨事執詞有以禁抑奸黨則
亦未便至此乃幸災樂禍坐視旁觀即其不與朱傑公
館安歇其欲挫辱之意可想見矣所據各官情罪俱難
輕貸通候查明之日另行叅究外為照碣石係海濱衛

分海賊停泊之區所視以為外援者良不淺也今少不如意即便豎旗稱變綑縛職官此其漸不可長也易曰履霜堅冰至似此形狀殆不止履霜而已若於此竟從姑息則廣東衛所如碣石者亦多矣寧保其不聞風效尤乎況今山寇屯劄海豐地方相離頗近各軍持久不散自度事不可解必內連山寇外引海賊流害地方此又不可不慮也伏望皇上勅下該部轉行督撫總兵官等從長計議作速解散仍將首禍脅從之人分別處治

其各該有罪官員容臣備查明實叅提究問庶幾人心
知覺而地方得寧矣緣係飛報地方緊急事理臣未敢
擅便謹題請旨

嘉靖三十九年六月十三日奉旨吏部知道

強盜打劫縣衙疏

題為強盜打劫縣衙殺死人命懇乞天恩查究地方官
員以警人心事據惠州府經歷司呈承准本府照會抄
蒙臣牌仰查劫殺知縣舒顥賊徒曾否損失庫銀與該

地方失事人員職名呈報依蒙查得嘉靖三十八年十一月
初二日據博羅縣主簿汪樂手本呈稱本月初一
日夜二更時分被強盜一陣往縣背衝入後衙次及庫
縱火燒燬後棟并庫中盜賊強盛官兵抵敵不住知縣
舒顥被傷身死一家傷死四命門子一命等情到府行
據本府照磨曾尚仁呈稱會同主簿汪樂教官孔弘俊
等當堂吊取庫簿查得新舊存在庫銀一千零二十七
兩三錢六分二釐入庫眼同驗看庫外排柵庫門鎖鈕

並無損壞又驗得知縣舒顥被傷身死併一子一壻家人一名門子一名俱被傷死燒燬後堂衙宇一座七間理合呈報隨該本府署印通判黃若海詣縣覆驗相同又該知府顧言前往梧州稟議地方事宜回還經過本縣親驗無異及查該縣巡捕典史余珏主簿汪樂巡風該吏黃若瓊併一應守城巡更兵壯人等俱屬有罪相應提究等因到臣案查先奉都察院勘合劄付准吏部咨為舉劾方面官員以肅政體事該本部題覆前巡按

監察御史徐仲楫論劾知縣舒顥才力不及所當改調
題奉欽依移咨備劄仰臣依奉案行廣東布政司行令
本官解任起送聽調及行該府委官照磨曾尚仁交代
接管去後續據惠州衛呈該博羅縣主簿汪樂手本報
同前因臣隨牌行守巡兵備該道併該府衛訪捕真賊
解報仍將失事人員查叅呈奪續據廣東布政司分守
嶺東道左叅議馮臯謨按察司專理鹽法兼管屯田水
利帶管嶺東兵備分巡道僉事殷從儉會揭開稱各職

依蒙星夜兼程馳至該縣會查得知縣舒顓因為調任收拾起程於十一月初二日打發女壻徐瑯先回不料初一夜二更被賊徒一十八人密從北城越進竊入衙內先拏女壻徐瑯勒銀不得徐瑯喊叫隨即戳死又拏本官次男舒惟備在於後園空地拷打要銀比有舒顓并家人舒盛三門子葉潮近救一槩被戳身死將本官衙金銀首飾衣服財物劫去一空及開款查議防捕事宜前來又經批行及行廣東按察司併惠州府備查該

地方失事官員從重叅呈未報續於嘉靖三十九年二月初七日據該府捕盜通判洪章呈併和平縣申俱為緝獲打劫縣官強盜事內稱拏獲劫殺知縣舒顥賊犯李老仔劉汝秀等審據供稱原係該縣不識姓名民壯數人探知本官多有財物糾同劫殺等情復經批行分巡道究問招詳併催司府查報去後今據前因臣復行查得比因帶管嶺東兵備分巡道僉事殷從儉分守嶺東道左叅議馮臯謨各為潮州倭賊生發惠州府知府

顧言亦以該府地方事宜俱赴梧州軍門議處廣海衛指揮陳學翦已於去年九月二十五日奉到勘合推陞惠潮守備尚未赴任以致地方空虛各賊乘機竊發逐一查明前來為照博羅縣聽調知縣舒顥居官不檢積有餘資既奉改調又復延住慢藏誨盜自取殺身誠不足惜但越城殺官漸不可長而賊止一十八人追捕甚易所據地方官員既不能弭盜於平時致令竊發又不能擒滅於臨事縱使遯逃相應通行查究以警將來者

也叅照惠州府署印通判黃若海博羅縣署印本府照磨曾尚仁均承視篆之責全無任事之艱惠州府捕盜通判洪章惠州衛巡捕指揮任元相博羅縣巡捕典史余珏專司防捕之職均乏捍禦之方以上各官俱當懲究者也守備惠潮地方以都指揮體統行事指揮同知陳學翦延緩不行赴任以致備禦乏人博羅縣主簿汪樂既為協理之官難逃坐視之罪以上二臣亦當均治者也再照廣東按察司專理鹽法兼管屯田水利管嶺

東兵備分巡道僉事殷從儉廣東布政司分守嶺東道
左叅議馮臯謨惠州府知府顧言雖俱以公事遠涉他
郡勢難遥制情若可原但均受地方之重寄乃致寇盜
之入城亦難辭責者也伏乞勅下該部再加查議將殷
從儉馮臯謨顧言量加罰治惟原其遠離地方姑從輕
貸其黃若海等容臣提問巡風守城吏壯黃若瓊等一
併究治仍勒限捕獲賊犯明正典刑庶幾人心知警而
地方允賴矣緣係云謹題請旨

嘉靖三十九年五月十五日奉旨該部知道

頻遭倭患荒旱疏

題為地方頻遭倭患荒旱相仍人心騷動懇乞天恩俯從寬恤以安邊方事據廣東布政司分守嶺東道左叅議馮臯謨揭帖稟稱潮州府屬海饒潮揭惠來五縣地方自舊年十一月以來倭寇侵境迄今五月餘各鄉居民俱被殘傷復據潮惠來等五縣節次報山賊五千餘徒屯聚洋委減水貴山黃坑等處流劫多係被倭殘害

之民今當兵燹之餘又值天時亢旱穀價騰貴以致鼓
衆投合為亂大埔又有木害之賊千餘突劫饒平職看
得人心思亂羣盜竄起若不早為區處致效尤者衆愈
難為力已經督令饒潮揭惠大埔五縣巡捕典史萬邦
邑等兼同各都千長多起鄉夫協同各該應捕官兵加
謹截遏一面給示招撫諭令作速解散節據各縣被害
軍民紛紜赴愬咸謂兵荒飢困一切錢糧望乞停徵以
安人心等情伏望軫念地方被害萬姓遭殘乞行本道

酌量賑恤仍行本司議將海饒潮揭惠來沿海五縣應徵嘉靖三十八年分糧銀暫行停徵如應解京庫之數亦即那借別項官銀代解其派撥各倉軍士月糧或軍餉銀米間有急當支應勢無容緩者聽該縣掌印管糧官查儘殷實排年漸次徵解毋及貧民地方平寧百姓安妥聽本道督行各掌印官嚴限帶徵追補等因到臣案查先據嶺東守巡兵備巡海叅將等官呈稱倭賊三百餘徒由潮陽縣海口又有千餘徒從福建招安突入

饒平縣黃崗鎮外放火燒屋併據惠州府海豐縣申稱
山賊五百餘徒突劫本縣楊安金錫興縣石塘吉康等
都坊殺擄人畜潮州府呈稱山賊五千餘名屯聚潮陽
縣貴山減水洋烏等都攻寨殺掠又有千餘住劄饒平
縣大埔木窖為巢穴劫柏嵩嶺上饒地方等因各報前
來俱經具題訖續又據巡視海道副使鄭維城分守嶺
東道左叅議馮臯謨分守高肇韶廣左叅將鍾坤秀呈
稱嘉靖三十九年三月十九日有洪老倭船三隻約賊

一百五十餘徒使至惠來縣下涌港登岸突劫荊龔村二十五日要往甲子門所地方尋船下海本月二十六日又有大白艚船四隻突入潮陽縣河渡門海口被兵把截三隻在海一隻登岸約賊一百餘名屯聚江頭二十七日突至本縣南門外城下官兵拒敵斬獲倭級三顆各賊退遯深浦村屯剗併據潮州府呈據防守饒平縣黃崗鎮武舉鎮撫余盛報稱四月初五日有原在上壘倭賊已到下饒又有四百餘跟前倭蹤犯到竹林堡

初六日突至東門外率兵禦擊遯往土名劉厝埭住劄
該臣看得舊倭未去新冠復來又經嚴督各該官兵上
緊勦捕及具題間隨據副使鄭維城左叅議馮臯謨左
叅將鍾坤秀合呈為官兵夾勦敗遯倭賊再報大捷事
內稱賊從潮陽縣地方登岸與突越黃崗鎮二起大勢
倭賊湊同新倭合夥流劫官兵追逐擒斬功次數多各
賊知懼已於本年四月十九日遯海開洋去訖其潮陽
土賊湊合洪老海賊亦於十九日奔遯招收都海邊尋

船將從海遯等因連將獲過功次併查叅各該失事官員呈詳到臣除抄行按察司會覈去後隨該臣看得倭寇雖遯但地方殘破荒旱相仍米價騰貴人情洶洶必須多方計處庶無他虞牌行該道勘議間今據前因臣為照潮州自嘉靖三十七年正月至今倭奴凡三犯其地間閭焚殺之慘道路悲號之聲殆可為寒心矣今雖仰仗天威遠震諸臣効力陸續擒斬頗多餘孽悉遯而各處山寇蠭起警報日聞况傳聞福建新到倭寇甚多

彼處搶掠既盡勢必復越潮州而再過數月又當風汛
之後其將來者或未可量也以我極疲之民而膺彼無
厭之寇其何以支且廣東耕作之期俱在二三月間自
冬徂春沿海一帶地方盡為寇盜蹂躪之場民失農業
即今米價騰貴秋冬又當何如失今不為計處復加催
苛欲民之不為盜不可得矣臣嘗思之假令以廣東盜
賊之害移諸浙直之間則議蠲議貸當不知何如矣今
廣東之民皆赤子也而二三年間曾無齒及撫恤之者

豈以其遠而遂棄之乎臣近接邸報兵部一本倭寇猖獗懇乞聖明申飭督撫諸臣速加勦防以靖地方事欵開一件何以安民議得東南自倭患以來兵荒相繼十室九空徵斂百出不止提編之苦剝削萬狀誠為激變之由皮盡而毛無附良可痛心合無備行總督撫按官督同司府州縣等官務將殘民多方撫字一切無名之徵以次停罷被災地方應該何以賑貸蠲免具實奏聞聽戶部處分等因題奉欽依臣伏讀再三不覺涕下有

以仰見我皇上好生之德如天之仁欲使天下無一夫
一婦不被堯舜之澤也今臣待罪地方目擊民困我皇
上勅令奏請而臣又不以請可乎除將賑恤事宜催行
該道議處外所據應解京庫銀兩臣查得海陽縣該銀
三千五百四十三兩七錢四分一釐潮陽縣該銀三千
八百九十九兩八錢八分六釐饒平縣該銀三千三百
二十五兩九錢九分五釐揭陽縣該銀一萬四百七十
兩六錢九分惠來縣該銀二千三百四十二兩三分又

查得惠州府海豐縣該銀五百二十三兩一錢二分七釐亦應一體議處通共該銀二萬四千一百零五兩四錢六分九釐今邊餉甚急內帑空虛揆時與勢似難蠲貸合無俯從該道所請前起運京銀那借別項銀兩先行抵解但布政司苦於錢糧缺乏歲派繁多行令借貸未免遷延則既不能釋百姓延望之苦而又反誤京庫起解之期徒費文移終為無益臣隨查得該司廣豐庫貯一項先該提督兩廣都御史談愷奏留海防之用事

例銀五萬九千零五十五兩水脚銀一千一百八十一兩一錢似可那解伏望皇上勅下該部查將前項銀兩于內定議二萬四千一百零五兩四錢六分九釐補足各縣京庫起解之數其各縣一應存留銀兩除十分緊要者行令該縣查將殷實排年量行追辦不得槩及貧民勢可緩者暫行停徵通候事寧年豐次第追補其賑濟一節容臣等從長議處庶幾天恩覃布寒谷生春民命得以少延人心因之大定而地方永保無虞矣緣係

云云謹題請旨

嘉靖三十九年八月二十三日奉旨吏部知道

舉刺官員疏

題為舉刺方面官員以昭勸懲事臣竊聞之昔人有云天下之本在於郡縣而郡縣之責付之監司則監司者固郡縣之本源也本正而後末治源潔而後流清監司之有關於庶官也亦甚重矣所關既重則任之不可不慎所任當慎則察之不可不精臣本樗材謬膺明命自

入廣以來首尾二十餘月其於藩臬之官究心久矣或因文以稽其政或循名而責其實臧否情偽頗得其概今當事竣敢冒昧陳之除按察司按察使劉廷誥副使宋大武僉事李伸今丁憂沈淮賢能任淺僉事王學已經保留俱不敢驟舉外訪得布政司右布政使雷賀恂幅之姿無所裝飾端凝之度不事依回非孑以為行而律己之嚴自無纖毫之可議非察察以為明而馭吏之肅自無關節之可通專理清戎而閭閻鮮勾擾之虞

掌理司事而錢糧罔出納之弊分守嶺西道右叅政劉
慤雅抱清心惟金惟玉謹言正論以準以繩尺度衷藏
事熟於敷歷之久聰明內蘊識定於聞見之多憂民憂
真如已憂而凡所區裁到手便能身任事國事不啻家
事而諸所興革隨施輒與民宜分守嶺東道左叅議馮
臯謨明作足以集事而惇大常存廉靜徵於持身而圭
角不露擔當之量恒見於人所共避而幹理不事虛文
處分之宜每妙於勢所難為而盤錯益占利器搏空拳

以當數萬之寇而鼓舞衆庶累策奇勲秉赤心以理積
弊之邦而惕勵官寮頓回惡習糧儲道左叅政袁應樞
精明弼治而應物則和平易近民而防己則密砥礪有
同乎筮仕一毫不苟施為迅發乎壯猷隨事有條撫字
寓於催科之中而十郡誅求之苦若洗防閑先於官吏
之弊而百年輸輓之政一新分守海北道右叅議田楊
文可飾治學足潤身恬雅之資不事表暴而政日見其
修舉簡靜之體無所更張而民自樂其安平允矣溫恭

之人可當督學之職按察司南韶兵備副使賀鏤冲謙之度可即可親莊慎之資匪隨匪激任久而地勢民情若駕輕車於熟路才通而投艱遺大若遊利刃於金牛居四面受敵之鄉而撫捕咸宜兀然為嶺南之保障處一省衝疲之地而恩威並濟晏然成海外之藩屏原任提學副使今丁憂楊載鳴文章可以載道學術足以經時直方之操正己率物而士人有不戒之孚剛大之氣自始至終而寮屬起可象之敬校閱生徒則藻鑑常空

而興行之機更溢於締章之外署理司事則綱維獨振而欽恤之意尤寓於用法之中清軍副使張子弘器度恢宏風猷振發昔居瓊牧尚遺何武之思今擢憲司益勵范滂之志才能達乎時變歷管諸道而舉動咸得其宜守可質諸鬼神齋捧入京而臚餽一無所染嶺西兵備僉事皇甫渙外朴而中則通政平而法自肅處劇繁之道而廢墜俱舉每徵訟獄之攸歸當寇盜之區而緝撫得宜已見民徯之共戴實心實政有守有為以上諸

臣職任不同器局亦異然皆聲望昭著才守俱優所當薦揚者也又訪得原任分守嶺南道左叅政今陞河南按察司按察使徐南金西臺風采素重於士林南海聲名更騰於往昔修潔之行可式可矜堅白之操不淄不磷羣吏望風而思治庶民懷德而傾心之一臣者雖經陞任但資望已深志行超特實為公輔之器仍當待以殊擢者也原任鹽法道僉事今致仕殷從儉心實才雄識明行潔兼管諸道而應劇有餘專理鹽法而夙垢不

染勒新陽之寇贊襄之力居多殲潮州之倭籌算之功
為最之一臣者雖因疾乞歸但年當強仕才可大施遽
捐田野深為可惜仍宜起用者也如蒙皇上勅下吏部
再加查訪如果臣言不謬將雷賀等併徐南金俯賜擢
用楊載鳴俟其服闋之日擢用殷從儉起用則黜陟明
而人心知所奮勵藩臬當而庶官有所依歸其於治道
或有補矣緣係舉刺云云請旨

嘉靖三十九年十一月二十一日具題四十年正月二

十一日奉旨吏部知道

薦舉境內人材疏

題為薦舉境內人材以備錄用事臣竊惟帝王圖治之機每求人於舊而人臣報國之義當以人事君況當明盛之世固宜野無遺賢而偶值多事之時尤宜老成是用臣本昏庸謬承明命所至之地輒効咨諏具於地方俊人知之頗真知而不以告是蔽賢也臣之罪大矣敢敬陳之原任詹事府少詹事今致仕黃佐少負奇瑰之

才已蜚聲於翰苑晚貞幽隱之操乃寄迹於山林博極
旁通乎子史而獨窺夫性命之原文采每發為詞章而
尤精於刪述之筆白首傳經盈生徒於几杖清心守己
詎俯仰於公門原任巡撫貴州都御史今回籍聽用李
義壯通練之才素稱於仕籍直方之器益重於鄉評抱
濟世之弘猷而絕無希進之心惟閉門而教子當暮年
之間適而猶懷進德之意每闔戶而親書擇行擇言一
見便知君子必誠必信舉鄉目為正人原任福建布政

司左布政使今致仕鍾卿永蘖之操自筮仕不渝於晚
節金玉之德真赤子不失於大人赴任閩中隨半肩之
行李放歸故里駕一葉之扁舟茅屋數椽而叔姪弟兄
共棲其內山田半頃而菜羹蔬食不厭其貧且廉者易
於近名而彼獨圭角不露或貞者流於絕俗而彼獨坦
夷可親原任江西布政司右叅政今侍養守制服滿鄭
廷鵠宏才妙選華名素重於明時雅志清修碩德更隆
於南粵因親棄仕庭幃曲盡其誠捐俸築城鄉邦咸倚

為重當此壯猷之日正其効用之秋况值親終之餘猶
宜召用之速原任廣西布政司左叅政今致仕譚大初
風裁獨持所至有廉明之譽孤貞自許隨在著表正之
功崇雅黜浮辨每嚴於義利杜門謝客志久絕於紛華
處以綱紀之司必多培植之力之五臣者年雖各異精
力俱堪才雖不同裨治則一况稽其放歸之故原無罪
愆而因其靜養之餘更多淬礪若以有用之才置之無
用之地誠有大大可惜者伏望皇上勅下吏部再加查訪

如果臣言不謬即將黃佐等及時起用則因才授任之下必各罄其未究之施而感恩圖報之餘當益奮其餘年之力矣緣係云謹題請旨

嘉靖三十九年十一月二十一日具題四十年正月二十日奉旨吏部知道

舉學職疏

題為舉學職以勵士風事臣竊聞之周禮以太宰繫邦國之九兩以司徒安萬民之六俗而皆以師儒行乎其

中者誠以九兩無師儒之繫則無以淑人心六俗無師
儒之聯則無以厚民俗甚矣天下不可一日無師儒之
功也況廣東僻處山海之間素多朴野之習其有賴於
學校以移風易俗者尤不淺也夫何師道不立正學日
微日暮途窮者比肩而績文敦行者罕覩臣於巡歷之
處徧加考詢每得一二於十百之中誠不敢默也謹循
例薦舉以備採擇訪得廣州府從化縣儒學教諭陳其
歲青年妙質雅志奇才試其文則鏗然有金石之聲而

意趣悠揚迴出塵凡之表稽其行則軒然懷鴻鵠之志而操持端潔自拔等第之中南海縣儒學教諭劉裁志行不羣廉隅自礪嚴於待士而條教為之一新慎於持身而詞章尤其獨擅仕雖迫於為貧志猶切於謀道新會縣儒學教諭康日章氣度恂恂尚如處子襟期磊磊真是淑人少年即負華名偶羈足於櫪下入仕尚能苦學終脫穎於囊中況占羣弟之歸心尤見為師之得體韶州府仁化縣儒學教諭張鳴鳳器識老成丰神秀拔

摘詞俊雅殆非章句之流立教端方克正塵囂之習志
不屑於小就可期於大成肇慶府高明縣儒學教諭
管惟乾博雅之才庶幾碩士端凝之度克稱師模立課
會以作儒生已見文風之丕變捐俸資以濟寒士因茲
善類之景從之五臣者就官未深賢聲俱著巍科可望
妙選亦宜伏望皇上勅下吏部再加查訪如果臣言不
謬俯賜作養或緩於民牧之擢以需其成或待以清曹
之選以展其學則賢才錄而儒官思奮師道立而善人

自多其於風化或亦有小補矣緣係云謹題請旨

嘉靖三十九年十一月二十一日具題四十年正月二

十二日奉旨吏部知道

舉刺有司官員疏

題為舉刺有司官員以飭吏治事臣竊惟致治莫要於
得民而得民莫先於守令是以古昔帝王必以重民為
首務重乎民必重治民之官而於其所親近者尤重焉
守令是已矧廣東素為易肆之地而頻年又當多事之

秋守令之不可不重又有甚於他省者然臣又聞之左
雄曰安民之道惟在用賢用賢之道必存考黜則甄別
賢否以為黜陟之本者又重守令之要務也邇者累奉
綸音申嚴守令之選臣有以仰見我皇上重民致治之
盛心矣臣本樗材謬膺重命其於守令之賢否廣詢博
訪者幾兩年矣今當事竣敢敬陳之除廣州府知府陶
大有南雄府知府章接賢能以經陞任瓊州府知府李
慎韶州府知府張景達潮州府推官鄭仕廉州府推官

郭岳化州知州畢竟立饒平縣知縣林叢槐高要縣知縣尹鳴商三水縣知縣陶守訓樂昌縣知縣程大經賢能以經禮待高州府同知李渭崖州知州盛賚汝電白縣知縣戴甫賢能准送給由俱不敢擧舉外訪得惠州府知府顧言操持若美玉真金心事如青天白日時多烽火而弭盜安民之略百事有條地屬衝疲而供應饋遺之常一塵不染風清而弊自絕吏畏而民則懷廉州府知府熊琦冰操素堅而四知之金無人敢贈風猷茂

著而三尺之法惟彼獨持嚴於數歷而庶事必親吏皆
斂手寬於養民而諸費俱約人已傾心豈惟郡牧之循
良實作邊關之鎖鑰雷州府知府魏文煥才雖通而不
事表白守固定而無所矜持敷政則寬猛得中法不弛
而吏自肅居身則禮義是守已不失而人自和奉均平
以節民財戴之有如父母嚴保甲以弭寇盜倚之無異
干城肇慶府知府徐鷁文采內涵真誠外見克勤克慎
廢墜舉而寮屬絕供饋之需不激不隨治行平而民謠

興遐邇之感表裏如一庶幾惇懃之良吏毫髮不緇允
矣清修之吉人廣州府同知曹司賢清苦之節可以質
諸鬼神堅確之行可以要諸金石視府篆而弊蠹悉除
豪右亦皆屏氣當委任而怨仇不避姦宄自無遜形肇
慶府同知呂天恩宦久而操益堅志廣而才克濟智能
料敵奇勲樹於他年心切愛民惠政孚於今日承委而
惟公惟謹所至即有遺思佐郡而不剛不柔隨施輒有
實效韶州府同知蕭元征精明雅能任事廉潔徵於持

身剔弊發奸而法不撓於豪右疏壅決滯而權不移於吏胥稽查則才猷茂著而事皆有條監舶則苦節益貞而餉因倍額潮州府通判翁夢鯉言訥才通外和中勁署篆值兵荒之日而勞徠多方民視之真如慈母督巡當水陸之侵而調度有術人倚之不啻長城殲倭寇於南陽功收不朽解山賊於潮邑事起不虞績固難湮超當不次廣州府推官俞咨益性溫若玉行潔如水識明而達叩其中不愧鴻儒才練而詳觀其政真如老吏奉

委而廉明獨著事無遺姦理刑而情法並行民無冤獄
惠州府推官賀涇敷歷深而才猷自達拂抑久而造詣
更純讞獄則人莫敢欺而行之以恕所在稱平稽查則
法固不廢而秉之以公隨委輒當才堪遺大而圭角渾
融志切匡時而鋒銍蘊藉番禺縣知縣湯應科器度謙
冲真如處子操持清白無愧天君不炫赫赫之名而飭
躬勵行之誠上下咸信不為皦皦之狀而潔已勤民之
政終始不渝愷悌已見於宜民才華可膺乎妙選南海

縣知縣陳思忠才捷而性則溫政通而志則定隨處能
加節愛下民歡若更生遇事輒勵精勤上官賴以分理
處最繁之邑而不激不隨器識自別當筮仕之年而有
為有守遠大可期揭陽縣知縣彭文質志潔行修識明
才練民遇流離之後而悉意招徠獨著撫摩之政已當
軍旅之繁而多方經畫聿成保障之功惠德旁敷口碑
若一以上諸臣官職雖有崇卑歷仕雖有久近要之皆
為守令之良所當薦揚者也伏望皇上勅下該部再加

查訪如果臣言不謬將顧言等循資取擢則臧否明而羣工自爾知奮黜陟當而蒸民因之得所矣緣係云

謹題請旨

嘉靖三十九年十一月二十一日具題四十年正月二十一日奉旨吏部知道

上廣東均平里甲議

其法先計州縣之衝僻以為用之繁簡令民各隨丁力輸銀於官每遇供應過客及一切公費官為發銀使吏

胥老人承買其里長止在官勾攝公務甲首悉放歸農
廣人便之某自以報代在邇恐後至者不能守乃上疏
言嶺表去京師絕遠比來牧民者視為利藪屠剝萬狀
而小民仰九重霄漢之上愁苦之聲無路自達故相
聚為盜臣為是痛心疾首已將里甲弊政更張一新顧
天下之事立法不難守法為難守之於畿輔之地固難
而守之於嶺海之外為尤難宋蘇洵有言遠方之民雖
使盜跖為之郡守檇杙為之縣令民羣嘲而聚罵者雖

百千萬輩朝廷不知也故其民常多怨而易動今廣東之民既怨而動矣若非仰仗明旨叮嚀雖有周公之法誰與守之疏入戶部請以其言行通省如法遵守年終籍記用銀數目以聞報可

不孝大復竊覽先大夫東粵疏而抱終天憾且潛焉不忍讀云曩先大夫按東粵值倭夷外獗民盜內訌攻城殞師警報狎至先大夫蒿目焦思所為創艾其不逞而拊輯其流亡一切重鉅不易便宜擘畫者奏

報重趼無寧日事竣有柏臺甘露之異粵士大夫競
為詩若文侈其事而及瓜期有山谷采阻之老百餘
歲以上者入堂皇願一識面先大夫行咸奔集挽留
百里間為之塞衢罷市已知王程不可稽迺肖像
以祠祠多靈異先大夫之得粵心若此其疏多碩畫
可知也不孝猶追憶粵疏卷帙幾三寸許方不孝入
都待補而先大夫即世竟不知入何人手化為烏有
及還以奏議付厠工獨粵疏莫可跡勉從掖垣覓之

僅寥寥數首如右云耳嗟乎不孝於先大夫之含殮數千里莫聞而尤併其生平手澤而失之沒先烈徽猷弗述泥粉榆世誦弗彰畢世無涯之憾將奚贖哉特於疏末聊罄哀悰以表先大夫之於粵事注措獨勤不孝陟岵之思於粵疏獨切而海內名公之知先大夫者第以弗克荷薪責不孝而聊以數首見先大夫於羹牆可也其必求核實於當年則有粵中之諸碑記在男大復百拜跋

潘司空奏疏卷一

欽定四庫全書

史部

潘司空奏疏卷三

詳校官子監司業_臣納麟寶

編修_臣裴謙覆勘

總校官檢討_臣何思鈞

校對官主事_臣雷純

謄錄監生_臣胡澄

欽定四庫全書

潘司空奏疏卷二

明 潘季馴 撰

兵部奏疏

謝賞金帛疏

為恭謝天恩事臣於萬歷九年九月初四日接到邸報該工部題為恭報大工未盡事宜今已完工并敘効勞官員事節奉聖旨凌雲翼陞俸一級還與潘季馴各賞

銀五十兩紵絲二表裏欽此隨於十月十開日據百戶

劉舜元齋捧到臣當即焚香望闕叩頭祇領外臣不勝感激不勝惶悚伏念臣以樸樾庸材謬肩鉅役曾無涓埃之效屢沐曠蕩之恩方慙報塞之未能豈意寵頒之渚及矧茲湖隄未盡之工皆出廟堂先憂之志兩河既已順軌旋復慮及諸湖大工方爾告成猶欲求其全美爰是尚書凌雲翼當受事之始即自虛心講求而臣於將行之時猶得與聞謀議此實廟謨成算非臣等之所

能及也且計湖工之舉在臣離任之餘焦心苦思董率
於羣寮之上者乃雲翼一人之力櫛風沐雨胼胝於水
土之間者實司道諸臣之功臣無纖毫之勞亦蒙稠渥
之典精鏐出之御府錫重百朋文綺頒之尚方榮分華
袞內自循省實為濫竽覆載難名慚報酬之罔極分涯
已過懼顛隕以非遙惟捐犬馬之餘齡用答生成之大
德誓堅精白敢忘在治之心矢竭衷丹祇奉垂裳之治
臣無任瞻天仰聖激切感戴之至

查議弓兵工食疏

為查議弓兵工食事職方清吏司案呈據南京五城兵馬司各呈奉巡視京城監察御史案驗為畿民困敝懇乞聖明查例責實以安重地事該南京雲南道試監察御史徐金星奏奉欽依裁革冗役等因備行各城依奉遵將中城弓兵革退有役一十名白役一百二十三名東城革退有役一十九名白役六十一名南城革退有役二十一名白役四十名西城革退有役六名白役八

十八名北城革退有役一十六名白役二十九名續據
中南二城兵馬司呈稱蒙巡視衙門案驗將見革有役
弓兵名缺呈乞掣補以便巡邏等因到司查得五城巡
緝併各衙門聽差及看守庫冊等項原額弓兵共四百
八十八名先於弘治十八年該貴州等道監察御史張
津等題准照例每名每年工食銀八兩五錢共該銀四
千一百四十八兩額派直隸蘇松常鎮徽寧安太等府
州縣均徭內編僉銀兩解赴本部行令各城召募弓兵

一年一換仍置立竹籤備造年貌籍貫文冊送司凡遇役滿及事故革退者具數呈報照名掣補聽給工食向因徵解不敷內有一十二名迄今未補今據呈稱革出前項名數除白役弓兵原無工食無容別議外其額設有役名缺似應掣補但近年添設巡邏官軍則弓兵原額之數亦不必備前項革退老弱有過七十二名併先年未補一十二名共八十四名相應通行裁革其各名原編工食亦應減編以蘇民困及查自嘉靖元年起至

隆慶六年止惟徽州府原額弓兵三十名工食銀兩全完外其蘇州府原額弓兵九十五名每年該銀八百七兩五錢共銀四萬一千一百八十二兩五錢內除解過外拖欠銀一萬一千七百六十八兩三錢五分一釐松江府原額弓兵六十一名每年該銀五百一十八兩五錢共銀二萬六千四百四十三兩五錢內除解過外拖欠銀四千六百六十兩五錢常州府原額弓兵七十三名每年該銀六百二十兩五錢共銀三萬一千六百四

十五兩五錢內除解過外拖欠銀四千四百六十六兩
二錢六釐九毫鎮江府原額弓兵五十七名每年該銀
四百八十四兩五錢共銀二萬四千七百九兩五錢內
除解過外拖欠銀六千一百四十兩八錢一分四釐寧
國府原額弓兵五十五名每年該銀四百六十七兩五
錢共銀二萬三千八百四十二兩五錢內除解過外拖
欠銀二百七十五兩四錢八分安慶府原額弓兵三十
七名每年該銀三百一十四兩五錢共銀一萬六千三

十九兩五錢內除解過外拖欠銀一百八十五兩三錢二分太平府原額弓兵六十八名每年該銀五百七十八兩共銀二萬九千四百七十八兩內除解過外拖欠銀九百六十二兩二錢三分七釐廣德州原額弓兵一十二名每年該銀一百二兩共銀五千二百零二兩內除解過外拖欠銀一百七十七兩九錢一分一釐各府州通共欠銀二萬八千六百三十六兩八錢一分九釐九毫又萬歷元年起至九年止除徽州府照額解完外

其蘇州府欠解銀五千六十六兩五錢松江府欠解銀三千六十六兩五錢常州府欠解銀二千三十一兩五錢鎮江府欠解銀一千七百二十五兩五錢寧國府欠解銀二百七十二兩安慶府欠解銀六十八兩太平府欠解銀五百七十八兩通共欠銀一萬二千八百八兩以致各役工食甲年後過者乙年尚不得領縱有支領數亦不敷以在官之人使之枵腹待哺而欲責其不廢公事不致生事害人勢所難免其積欠數多縣分本當

叅究但思積逋之數一則連年之荒歉難以辦納一則額派之數多徵解不前在小民則宜施寬貸之恩在各役則宜加及時之惠相應酌處通查案呈到部臣等看得弓兵多而工食不及徒滋騷擾銀兩多而徵解既難不免積逋舊逋不蠲新負益積徒費文移無資實用所據減革弓兵減編工食蠲免積欠一節相應題請伏乞勅下兵部再加議處如果臣等所言不謬將今革并原未募補弓兵共八十四名每年該工食銀七百一十四

兩行撫按衙門俱自萬歷十年為始於蘇松等府疲憊縣分酌量免編使小民得受一分之惠其自嘉靖元年起至隆慶六年止各府拖欠銀兩合無通查已徵在官者截數起解如有侵匿查實追徵果係小民拖欠者乞賜蠲貸使公家無案牘之煩而閭閻免催科之苦其自萬歷元年起至九年止各府拖欠銀兩以十分為率每年帶徵三分與當年額徵相應全完銀數俱赴撫按衙門掛號解赴本部交收巡撫衙門仍於每年終將見徵

帶徵過數目冊報本部查覈明實照依馬船工料比照
戶部題准拖欠京倉錢糧事例各該有司掌印官全完
者容臣等薦舉獎勵不及數者指名叅奏住俸降級如
遇考滿不准給由通候完至九分方准開復永為定例
庶當任守令加意徵解不致視為故事應賦者樂其寬
而輸納之必先應役者蒙其惠而勤勞之恐後矣

舉劾各營官員疏

為數陳愚見以裨營務以固重地事職方清吏司案呈

卷查先奉本部送准兵部咨該南京兵科給事中徐尚
奏前事該兵部覆奉欽依自隆慶三年為始查照京營
事規添設巡視科道各一員每年終將南京各營坐營
等官會同南京兵部從公舉劾等因備咨到部送司已
經通行欽遵去後今照萬歷九年終例應舉劾呈乞施
行案呈到部臣等會同巡視南京營務禮科給事中吳
江西道監察御史張 將各營官員逐一評品除應
該獎勵戒飭者查照舊例不敢瀆奏外看得大教場坐

營以都指揮體統行事署指揮僉事李棟兵機熟習智
勇超羣司會口而水戰有方莅大營而誓師得體神機
營坐營以都指揮體統行事署指揮僉事華恩識見精
明昔建奇功於海上才猷老練今昭勞績於行間守禦
浦子口等處地方以都指揮體統行事署指揮僉事楊
嘉言督屯不擾衛屬服其公平御衆惟嚴卒伍遵其約
束巡視屯田緝捕盜賊署都指揮同知呂逢兆才幹素
稱理江防而波濤無警威嚴夙著鎮池河而盜賊潛蹤

新江口把總指揮陳閏生奉職清修却常例於巡遊之
日御軍明察革積弊於造艦之年池河營把總指揮秦
金武藝精閑丰標特達三軍成敵愾之氣九矢有破的
之能大教場衛總指揮吳紹伯年方弱冠才擬折衝騎
射既所優長韜略尤能諳曉新江口把總指揮任弘道
謀猷出衆膽氣絕倫理營務止齊中法董遊巡緝捕有
方小教場把總指揮徐問丰姿英特器宇深沈部曲服
其嚴明寮竈高其廉潔浦子口把總指揮涂崑視龍虎

之篆八年軍中誦義任總營之職七載羣下懷恩大教
場把總指揮徐時雍年方英茂聲稱雅著於羽林材甚
堅強職業益修於營伍池河營把總指揮黃河清三捷
武闡才猷之敏給攸著一當練卒行伍之旌旗改觀神
機營把總指揮傅繼芳質稟雄奇才稱敏贍管屯田則
料索盡革司船政則甲役均平小教場衛總指揮劉葵
領步兵而需索罔聞已得拊循之體轉選鋒而軍營不
擾尤占雅潔之操大教場把總指揮蘭臺營機素練方

當英妙之年射技攸工堪寄折衝之任小教場把總指揮劉椿寬嚴得體能輸士卒之心訓練有方克振軍旅之氣以上諸臣均之有裨營務所當循資擢用者也伏乞勅下兵部再加查訪如果臣言不謬將李棟等循資擢用庶勸懲明而營伍有裨矣

條陳部司緊切事宜疏

為瑣陳部司緊切事宜以裨機務事臣伏念南都為根本重地而兵曹為機務要樞臣非其人寢食為懼所賴

四郊清晏之時歷年修舉之後庶幾遵循亦可塞責而求之宏綱大體亦無可訾者矣所有一二事宜或因仍舊習未經申明或釁隙初開相應釐正者臣敢不避瑣屑類疏陳乞伏望勅下該部再加查議如果臣言可採俯賜施行

一議充營伍以重防禦臣竊惟留畿首務全在兵營固以備不虞亦以杜窺伺也查得各營馬步軍原額一十二萬六千餘名今見在操演者僅二萬餘名每營多者

不過七八千少者二三千耳每歲勾補僅五六十名而逃亡之數倍之臣恐數年之後即求今日之數不可得矣萬一地方有事調遣不敷不免召募不戰之士非惟無濟於用亦恐緩不及事矣伏望勅下該部嚴行各該省分定以分數勒限勾補每年終容本部將一年解到軍數咨送兵部查考如不及分數從重叅究則營伍可充而國威自壯矣伏乞聖裁

一議清丈量以息爭端臣竊惟天下田土高下異等每

易混淆而軍民錯壤尤多隱占近奉明旨通行各省直將軍民田土逐一丈量誠正經界清積弊之首務也臣查得五十二衛所田地與民間錯雜者有屯田有草場有營房基地等項內除屯田原係屯田御史專職應聽查理草場係本道兼轄者該臣咨行都察院轉行本道會委各衛州縣掌印官公同丈量無容別議外止有江浦縣水夫營基舖地與太平府青峯等處草場止屬部轄並與屯田衙門無干累經清丈紛爭未息蓋在民則

以部司偏護軍夫在軍夫則以撫按州縣偏護百姓愚民執迷不省雖秉公清查而終未能服其心也即如江浦營房基地萬歷七年水夫漆成林鄒厚等告請丈量該先任本部尚書楊劄委主事劉體道丈量明白開造印信圖冊取有該縣依准在卷而萬歷八年復行爭擾水夫羅織橫興司官汙蟻人情洶洶幾至讎殺臣等多方禁諭幸已安輯若不早為清楚禍胎固在也今奉明旨丈量正當一體清理臣查得先年濟川等衛營房

基地亦被隱占該先任本部尚書王廷相奏行屯田御史清查陞科至今安安伏望勅下該部再加查議將前項草場營基容臣咨行都察院轉行屯田御史會同本部該司官除先經清查見無爭執者照舊管業外其餘未明基產弔取冊籍行委隔別賢能官員逐一清丈如原無稅課者計畝陞科造冊奏繳永為成則庶積蠹可清而爭端自息矣伏乞聖裁

一議定城守以便責成臣查得江浦縣設在江北正與

京城相望實南都之屏翰也向無城郭之設故未議守城之人近於萬歷八年題請建造而守城之兵則固未之及也臣查得各處省府州縣城池凡與衛所相共者城門鎖鑰皆屬衛所掌管則江浦縣城亦應屬之江淮衛矣但查江淮衛止有水夫而無軍伍水夫專管駕運物料輪流差遣並無著伍之士若責以守城殊無固志合無將本城守衛之事責之該縣坐撥壯快巡守鎖鑰掌之縣令巡邏責之捕職而江淮衛巡捕官一體巡緝

互相覺察其該縣巡捕等官仍聽本部節制每月朔取具不致疎虞結狀差人赴部投遞萬一地方有事仍聽本部調度不得抗違違者容本部指名叅究則該縣之守在民猶在軍而本部之責成在縣猶在衛矣伏乞聖裁

一議均兵餉以便操練臣竊惟兵食相需缺一不可查得池河一營設在鳳陽地方始於嘉靖十三年鹽徒猖獗本部議將廣武英武飛熊三衛舍餘軍丁內揀選一

千二百名春秋操演上操月分每名每月給糧四斗餘
月不支續於嘉靖二十九年為緊急邊報事本部又於
三衛揀選一千八百名湊足三千之數以備防禦月糧
未經題請權將前選一千二百名月糧分作二千四百
名支給餘下六百名聽憑在衛餘丁幫貼非惟貧軍不
堪而揆之政體亦大謬矣欲用其力而不食以食可乎
況此營為留都外護似不可少者近聞逃伍甚多萬一
有警將焉賴之查得先年孝陵衛餘丁選充三大營操

練二千五百名俱有月糧與正軍相等則池河營亦宜
比照支給但三衛餘丁並無別項差役較之孝陵衛少
異合無止照該營原議一十二百名之數止於上操月
分每月給與四斗餘月不准支給如有逃亡定須選補
務足三千之數比照三大營事例一體常川操練則實
數可稽而防禦有賴矣伏乞聖裁

一議裕作養以備選用臣竊惟武學之設所以儲養人
才預為他日器使之地立法非不詳矣但中間新襲職

人員尚有可議者查得武庫司職掌內一款各衛所指
揮千百戶年二十五歲以下告入武學者送司案候季
考又查得武選司職掌內一款隆慶二年據旗手等衛
指揮張文等連名具呈本部會議將十五歲以上二十
二歲以下幼官不係江操及堂弟姪叔借襲者具通狀
付送收學作養又查得職方司驗差職掌內一款各衛
所襲替回還官員查照武選司付文其祖父自來掌印
僉書管屯者子孫驗雜差若祖父係雜差操備者子孫

俱驗操備各等因夫觀武庫司職掌所載凡係幼官皆得入學作養矣觀武選司所載是原係江操及借襲者不許收學矣至於職方司驗差職掌所載則全視其父祖何如以為驗差差等而縱有年資青秀可以儲養備用者亦不得與朝廷作養之例矣夫立賢貴於無方而用人不於其類今以父祖之故而禁其子孫是罰及於嗣也以得借襲之堂弟叔姪而不許送學是與舍餘得告收考者殊科也至於江操不與尤屬無謂軍官一入

操備中人遽難振拔中間年青資美可備進取者不無其人殊為可惜合無今後如遇各官襲替回還武選司會同武庫司官從公揀選除年大不堪作養聽付驗發外如有年十六歲以上二十五歲以下氣質清秀及稍知文理諳曉騎射者即准送學候季考定奪考試不中仍送驗差不得一槩姑息則士路闢而人才自衆矣伏乞聖裁

擒獲妖黨疏

為擒獲逆天妖黨事萬歷十年二月十二日據蘇松常鎮兵備道揭帖呈前事萬歷十年二月初一日本道巡歷鎮江據知府王事聖稟稱據丹陽縣知縣甘士价揭報本縣典史包朝手下民壯教師謝朝選吳守禎首有妖僧糾黨謀反重情本道又訪得圖山營有水兵頭目錢山亦係姦黨隨即密行知府王事聖以查勘河道為名親詣丹陽又委同知高偉以點兵為名前去圖山會同把總徐道各緝訪去後續據王知府揭稱本月初四

日前至該縣弔取謝朝選吳守禎并見獲嚴斗隔別研
審供稱戴元六孔景龍將號票符篆給伊待後領官等
語又審據孔景龍供係遊方僧見住鎮江府龍華庵僧
人海注向在伊家誦經將符票數十張付伊令伊糾集
驍勇智謀之士糾人多者官爵愈大據此隨經密差快
手陳甫袁有蔡臣回府責令丹徒縣縣丞孫應溪督率
兵快徑詣龍華庵將海注等拏獲又該本官會同知縣
徐桓將甘露寺僧汪元洪等捕獲解府又准高同知捕

獲錢山一併到府該知府王事聖審據汪元洪等供稱
萬歷五年間有湖廣鐵佛寺僧名雪峯與伊相厚引伊
在於南京棲霞寺與順天人黃恩畫符一張與伊令依
樣摹畫轉給與人至萬歷八年三月內黃恩又寫勅一
張託方僧孤峯寄令翻刻刷印徧給糾有千人者封以
王侯元洪又與僧人大乘志元海注等商約將前符票
轉給與孔景龍戴元六嚴斗錢山德安東湖琴柱等轉
相給散又據元洪供稱伊兄弟十人北方五人名黃恩

黃仁黃義顧賓貞靜以仁義禮智信為號名曰北票元
洪與雪峯貞成蔡少溪元明以金木水火土為號名曰南
票約於四月初一日南方者在於南京報恩寺北方者在
於北京天寧寺各舉兵又云先取鎮江以據要害之地
次收傍郡庫藏以備軍餉之需又向平民說稱得此符
票者全家免死無者闔門屠戮中間情狀至有不可言
者今已發覺捕獲情真罪當者十一人其無知脅從情
可矜疑者九人除覆審的確另行招詳等因又據把總

徐道呈稱案據犯人錢山招稱勅符俱首犯甘露寺僧
省悟分給等情隨經責差官兵劉學等在於大沙普照
庵捉獲省悟并本庵僧護教到職審據省悟即謹聽稱
係丹徒縣大一都民自幼出家甘露寺為僧有本寺和
尚元洪并伊師父慶秀師公演聚於舊年正月內與孝
陵寺首僧便永號朝安立意造端今年正月十六日元
洪著和尚琴柱給聽勅一張內寫勅封護國同時一心
都督大元帥南字號總兵官聽委接收一向收藏房內

又將常勅一百一十張內總兵官勅二張與悟分給好漢至二月初五日將前勅到大沙普照庵內投先領符僧劉護教房內住下正要計較置酒請錢山尋人分給被官兵捉獲并搜出勅符見在等情又據普照庵僧護教招稱舊年十月內有僧元洪著僧琴柱將符十五張與教收在房內近二月初五日有僧省悟前來并帶勅一百一十張放在教房箱內商議分給今蒙官兵將同省悟捉住并獲原收在房符十五張勅一百一十張在

官等情并將省悟護教二犯及勅符呈解到道除已獲者審確另詳未獲者密緝嚴訪外係干逆天重情合先通行呈報等因到部據此案照先於本月初八日臣會操江都御史呂 及鎮江府報有妖黨戴元六糾衆為非臣慮鎮江密邇南都相應防禦且慮妖黨數多不無潛伏該府雖無公文到部自宜預為備禦隨劄提督巡捕署都督僉事王化熙并五城兵馬司嚴行訪緝職方司主事吳仕詮申嚴各門禁約加謹盤詰仍會同內守

備太監張 暨外守備臨淮侯李 武靖伯趙 諭令

各營官將日操軍馬加意整飭以防不虞外今據前因該臣照得雍熙全盛之世民心悅附既無間隙之可乘法令昭明之時武備森嚴亦非強暴所可逞况即各賊所刊票帖與其所供口詞皆係孟浪之徒原無毫髮知識遊食野僧借此煽惑愚民以為射利之計不足為慮也今已仰仗陛下威德先事覺發渠魁授首風聲所及自當駭散但留都根本之地防之不可不周除臣再行

申飭務保無虞如有緝獲賊犯另行奏報其鎮江府所獲妖徒聽彼處撫按并操江衙門審明具題又據供詞似於北京亦有潛伏該部自應題請處分臣不敢瀆陳外仍慮我皇上俯念根本重地不免南顧之憂合將前項緣由先行具題仰慰聖衷

酌議軍衛事宜疏

為仰體宸衷酌議軍衛事宜以安軍足餉以永保萬世治安事職方清吏司案呈奉本部送准兵部咨該刑科

給事中馮露題前事該兵部覆奉欽依移文九邊各省
總督撫按衙門查照所議行令司道總兵并大小將領
及衛所掌印指揮等官將各衙門公費銀兩差占人役
及一應錢糧但係軍屯衛所出辦者逐一清查一切近
時增派及無名供費盡行除革要見某衙門原額公費
若干今減若干止存若干原設人役若干今減幾名止
存幾名其聽用員役不得私占軍丁投充家丁不得多
支名餉至於各鎮投託報効名色把總白丁技藝之流

既無才勇又無職事徒寄虛名冒支廩糧尤為軍旅之
蠹者一切嚴查禁革發遣仍總將各營都司衛所每年
額設軍馬屯地子粒差役錢糧一一酌議停妥分款備
細造冊奏繳青冊送部查考以後永為遵守如或衛所
官員敢行科斂將領等官仍前占役外聽巡按御史內
聽科道各指實叅奏從重問遣本部仍酌量地方遠近
定立限期各遵依回奏備咨到部著實議處清理限九
年四月以裏具奏施行等因送司卷查嘉靖二十三年

該南京兵科給事中萬虞愷等題為欽奉聖諭事內開
查得嘉靖十年該本部先任尚書王廷相題為革役占
以實營伍事該兵部覆奉欽依內開見行事例京營提
督內官軍伴五十名總兵官三十名坐營官一十名把
總五名其南京內外守備等官跟用軍牢俱照見行題
准事例照額存留等因備咨前來隨該該科會同本部
遵奉欽依內事理會議得五府掌印官軍牢各二十名
僉書官軍牢各一十五名中府舍餘三十名餘丁一十

三名左右前後四府防軍各一十名舍餘各四名餘丁
各一十名該科刊刻恤軍題例存照又查大明會典所
載各處鎮守總兵官跟隨軍伴二十四名問刑條例內
開都指揮跟隨軍伴六名指揮四名千百戶鎮撫二名
額外不許多占又查得萬歷七年為恪奉綸音釐正公
用銀兩事該本部先任尚書楊 議題內開大小教場
神機等營都督坐營把總選鋒衛總各月給紙劄巡邏
都督把衛總各月支紙劄油燭大小教場神機等營坐

營等官選鋒衛總各家丁月給工食及旗手等衛紙割
工食銀兩等項具題該兵部覆奉欽依移咨本部欽遵
外今該前因遵照欽依事理行准南京內外守備中等
五軍都督府大教場等六營錦衣等衛所各查過公費
銀兩跟用軍牢差占防軍舍餘餘丁并投充家丁額設
軍馬屯地子粒差役錢糧各數目緣由回覆前來通查
案呈到部看得糜費錢糧占役軍伴實為營伍之蠹允
宜清查隨該臣等查得各衙門公費銀兩原無軍屯衛

所出辦及近時增派無名供費銀兩各官應得紙劄等項係該本部支給已奉欽依釐正俱有定額閱操賞軍等項費不可缺者即係各營租銀出辦難以減汰外至如先年題准存留費用銀兩數涉太濫相應裁減者則有錦衣衛之課銀是也其跟用軍牢防軍等項人役查與事例相合者俱應照額存留聽用官員並無私占軍丁無容別議外至如公會衙門公用人役數涉太多相應減半者則有外守備聽用之舍餘是也有一官兼管

他事而用兩處人役者相應各量加裁減以合事例名數如右前後三府僉書都督府營跟用軍牢是也又有各官員缺已經議裁及員缺久未推補而原用軍牢相應革去如中左二府錦衣衛各僉書并大教場撫管夷人都指揮跟用軍牢是也有違例占用相應革退如錦衣衛鎮撫千百戶餘丁是也有投充家丁虛糜糧餉相應裁減如三大營之家丁是也以上數項共該減去軍舍餘丁二百四十一名每年公費銀二百一十一兩七

錢八釐三毫五絲一忽五微六纖四塵家丁七十名每
年糧餉銀一千一百九十兩減革軍牢發營操備舍餘
餘丁發回原衛聽當正差公費銀兩行令該衛每年照
數徵解本部車駕司收貯家丁糧銀移咨南京戶部犒
賞銀兩於本部各住支俱永為遵守查正之後如有分
外取用軍丁派貼工食者容本部并科道衙門指名叅
奏處治及又查得額設軍馬屯地子粒差役錢糧係該
戶部總督糧儲并屯田御史衙門經理自有歲報文冊

本部似難重覆謹照原咨分款開坐前件議擬上請伏乞勅下該部再加詳議覆請明旨行臣等欽遵施行庶營伍少充而冗費可除矣

一咨開某衙門原額公費若干今減若干止存若干前件查准南京內守備并五府回稱原無額派公費錢糧外守備沿城并各營地租銀共七百二十七兩九錢八分七釐五毫一絲六忽南城房租銅錢一十四萬六千一百七十二文係備每年春秋二季閱操犒賞并日操

火藥及進表等項公費應用三營都督各坐營等官新任家火公宴月給紙劄并六營把總選鋒衛總巡邏把衛總等官月給紙劄油燭銀及旗手等五十一衛所紙劄工食共約該銀一千七百七十六兩有零俱係遵照近奉欽依釐正定數於本部地租銀內支給原不係取派軍屯衛所錢糧相應照舊存留外議得錦衣衛見存蘆洲租課銀四百二十三兩四錢一分六釐七毫三忽一微二纖八塵在衛支用近議裁革僉書一員前銀似

屬過濫允宜裁減合無將前銀革去一半該銀二百一十一兩七錢八釐三毫五絲一忽五微六纖四塵每年徵解本部車駕司收貯作正支銷其餘存衛每年終將用過數目造冊送部查考庶免冒破伏乞聖裁

一咨開某衙門原設人役若干名今減幾名止存幾名前件查得各衙門跟用軍役除南京內守備跟用軍卒各五十名中府掌印兼守備魏國公徐 後府掌印兼協同守備武靖伯趙 右府掌印兼提督操江泰寧侯

陳 各軍牢五十名左前二府掌印軍牢各二十名左
前後三府防軍各一十名舍人各四名右府防軍八名
舍人四名左右前後四府經歷司押送軍犯餘丁各一
十名中府舍人三十名經歷司餘丁一十三名錦衣衛
掌印官餘丁一十二名旗手等衛所都指揮軍伴六名
指揮四名各所千百戶二名大教場等三營坐營官浦
子口守禦官各軍伴一十名池河營捕盜都指揮餘丁
一十二名大小教場神機營浦子口各把總每員軍伴

五名新江口把總每員軍伴六名池河營把總每員餘
丁六名大教場等六營衛總每員軍伴四名管鼓火藥
馬匹并哨總千戶等官每員軍伴二名巡捕都督跟用
軍人一十五名把總每員軍人五名衛總每員軍人四
名俱係遵照會典恤軍題例問刑條例及先經題准名
數每年終本部并科道衙門選將各軍五十歲以上者
撥用內池河營捕盜官比各坐營多二名該營并新江
口把總每員軍伴比各營把總多一名祇緣一則江口

操巡一則捕盜地僻俱應照舊無容別議外議得右府
僉書都督軍牢一十五名內革五名又提督大教場營
務軍牢三十名內革一十六名前後二府僉書軍牢各
一十五名內各革五名又提督小教場神機營營務軍
牢各二十四名內各革一十名俱比照會典所載事例
二十四名之數外守備聽用舍餘六十名內革三十名
中左二府僉書錦衣衛僉書各員缺已經別卷具題裁
革各跟用軍牢中左二府僉書各一十五名錦衣衛僉

書一十二名大教場撫管夷人都指揮員缺久未推補
原跟用軍伴一十名俱應革退錦衣衛鎮撫跟用餘
丁六名各所千百戶跟用餘丁或六名或四名俱止准
留二名共減革一百零八名不得多占伏乞聖裁

一咨開聽用員役不得私占軍丁前件查得南京聽用
官員係各衛指揮千百戶赴京襲替考取一等者兵部
咨送本部聽用俱係帶俸官員一丁不敢擅用惟各衛
掌印僉書軍伴多不穀用以致派用餘丁或一掌印而

用二十餘名者有之合自今清查之後各官果無年及五十以上軍人充當軍伴者方許撥用餘丁指揮四名千百戶各二名照例跟用每年一換俱開報本部驗發不許踵襲舊弊如有五十歲以上軍人仍照例選撥不得擅用餘丁伏乞聖裁

一咨開投充軍家丁不得多支名餉至於各鎮投託報効名色把總白丁技藝之流既無才勇又無職事徒寄虛名冒支廩糧尤為軍旅之蠹者一切嚴查禁革發遣

前件查得南京大教場等營坐營等官每員家丁四名
把總官每員二名大教場等三營選鋒衛總官每員一
名俱係題准釐正之數並無多支名餉相應照舊及查
各營把總俱係京衛實職指揮及武舉等官題奉欽依
管事並無投託報効名色及白丁技藝之流無容別議
外議得大教場都督家丁八十名小教場神機營都督
家丁各六十名昔緣江海之警邊將隨帶邊丁一時權
宜收用所有糧賞悉從優厚每名每年給糧銀一十二

兩於南京戶部犒賞銀五兩於本部各支給比來地方
寧謐除各邊將帶回外仍有希戀糧賞者遺留前數在
營頗無實用但技藝稍堪相應量留以備緩急且皆四
方遊食之人散去似無歸著一時難以盡革今議將大
教場家丁革去三十名選存五十名小教場神機營各
革去二十名各選存四十名以後都督有隨帶家丁果
係驍勇出衆者容令在於本營家丁數內揀其老弱者
更換不許數外添補止許在營操備差用不許別項私

差伏乞聖裁

一咨開仍總將各營都司衛所每年額設軍馬屯地子粒
差役錢糧一一酌議停妥分款備細造冊奏繳青冊送
部查考前件查得南京大教場等六營額設操備軍人
八萬二千二百名今見在三萬四千一百一十名馬二
千七百八十四匹又錦衣等四十二衛屯種軍人見在
四萬九千四百五十五名設立屯營隨處操演其應支
月糧草料俱係各該衛所逐月將實在名數造冊開報

南京戶部并總督糧儲巡視倉場御史等衙門查同各軍自赴關支三大營撥出巡邏軍人共二千五百四十六名馬八百二十七匹各月加折支口糧料草銀兩係各該巡邏把總逐月造冊開送戶部徑自支給屯田子粒一十四萬九千三百六十六石七斗二合七抄三撮四圭六粟一粒五黍每年徵解浦子口等處應天等衛倉上納新增銀七千一百四十五兩三錢九分六釐五毫六忽四微二塵解送南京戶部銀庫交收係該總督

糧儲并屯田御史專管提調每年終各造冊具奏其差役工食如五府等衙門防軍軍牢俱係每年終科道等衙門揀其年過五十以上者撥用原於食糧操軍中選撥非因選撥之後更益糧餉也至於差占舍人餘丁不係食糧人數亦無別項差役原與在外營路都司衛所編差及係軍屯出辦錢糧者不同俱有合于衙門造冊奏繳本部應否咨取數目一體攢造惟復姑免重覆伏乞聖裁

潘司空奏疏卷二